

(3) per artificiosam productionem, non etiam (4) per intentionalem operationem; sed (5) illam, quæ per creationem fuit in Protoplastis, quæ *Castaneo* dicitur Imago imitationis, forsan vi etymologiæ, quam *Biel* sic notat, Imago dicitur quasi imitago, fit enim ratione Exemplaris sive Prototypi. Inter Imaginem autem & Exemplar omninò in proportio esse debet, quum hæc IV. Requisitorum imaginis unum sit. *Am.* si mavis, inter subjectum imaginis Dei, & Deum, cujus imaginis Subjectum anima principaliter est, esse debet proportio. Unde pro nostrâ thesi hoc esto Confectarium: *Quod fuit & adhuc esse potest Subjectum adequatum perfectæ Sapientiæ, Justitiæ, omniumq; cognoscibilium cognitionis, quæ res, ut sunt, attingit, quodq; Dei, rerumq; à conditionibus individuantibus per abstractionem liberatarum contemplatione quam maximè gaudet, Spiritus est.* Quum non minùs, quàm sonum videri, aut colorem audiri, animam rationalem & quodvis Ens spirituale à potentiâ materiali percipi repugnet. Hæc siquidem prædicata à materiâ sejunctissima sunt, quæ Subjectum ex materiâ conflatum habere non omninò possunt. *Vid. Thomas, Suárez, Francisc. de Oviedo, Murcia, aliq;.*

Q. 16. *Dicis:* Quare non? Deus enim materiam ita elevare potest super virtutem aliàs communem, ut idoneum sit spiritualium proprietatum receptaculum. Sic *Burserus*, unde *lib. 3. Introduct. ad Scient. Natural. cap. 2.* Animam ut sic dividit in plantalem, belluinam & Humanam, non ut Genus in species sibi invicem oppositas, sed in certos potius velut gradus ratione nobilitatis & subtilitatis seu (ut vulgò loquuntur) ratione majoris aut minoris elevationis. Et paulò post de hominis animâ hæc subnectit: *Homini denique functiones principaliores altissimè elevantur, & per species subtilissimas occupantur circa res divinas & sublimes, modo quodam excellentissimo, & penè spirituali.* Resp. Elevatio omnis, quantum ad præsens, vel terminatur in materiâ, vel supra materiam extenditur. Quæ in materiâ terminatur, ad materiam tantùm referri potest, utpote per quam illa eminentior redditur ad recipiendas proprietates excellentiores, quàm ante hanc elevationem habuit, manendo in eodem genere, materialium scil. Sic inveteratorum mortuorum corpora quæ *Aristot. lib. 4. Meteorolog. cap. 12.* subito cinis fiunt in sepulchris vel cinis ipse, in quem resoluta illa corpora sunt, per potentiam Dei olim elevabitur, ut illud ipsum corpus esse possit, quod ante

corru-